

---

---

## EF 3:14-21 : 'N APOSTOLIESE GEBED [3]

No. E9 / W769

---

---

Ons het twee keer na v.14 gekyk. In die proses het ons taamlike wye draaie geloop. Vandag kom v.15 aan die beurt.

### HOE MOET ONS DIE VERS VERTOLK?

□ Dis nogal moeilik om te besluit hoe die vers vertaal moet word. Dis nie dat die Grieks so moeilik is nie, maar daar is twee vertolkingsmoontlikhede. Mens hoef maar net na 'n klompie vertalings te kyk om dit raak te sien. Kom ek verduidelik.

- Die eerste opsie kan min of meer só lui: *van wie elke geslag (of familie) in die hemel of aarde sy naam kry*. Dit is die keuse van die OAV, asook talle Engelse vertalings. Wat dit dan sê, is dat alle lewende wesens — ook die engele — die naam van hulle Skepper dra en hulle bestaan aan Hom te danke het. Hierdie vertolking eer God dus as universele Skepper van alles en almal.

- Die tweede opsie kan min of meer só lui: *van wie die hele familie (of gesin) in die hemel en aarde sy naam kry*. So vertaal onder meer die NAV, asook die NIV, die KJV en die NKJV. In hierdie geval word gepraat van al die kinders van die Vader — die Godsvolk — wat al heengegaan en in die hemel is, sowel as diegene wat nog op aarde is. Dit gaan oor die triomferende én die strydende kerk as 'n geheel, en eer God as die reddende Vader van almal.

□ Ek is baie oortuig dat laasgenoemde die korrekte vertolking is — en is bly om te sê dat talle

kommentatore en predikers wat ek as betroubaar leer ken het, ook so dink (Hodge, Spurgeon, Lenski, Hendriksen, Lloyd-Jones, Stott e.a.).

Maar waarom is ek so oortuig daarvan? *Hoewel die Grieks van die vers self nie uitsluitel gee nie, dring die konteks oorweldigend daarop aan.*

### DIE AGTERGROND VAN PAULUS SE GEBED

□ Dit is nodig dat ons vinnig kyk na wat Paulus voorafgaande aan hierdie gebed van hom skryf, aangesien dit ons nie net sal help om ons teks verantwoordelik te vertolk nie, maar inderdaad om die hele gebed beter in perspektief te plaas.

□ Soos twee weke gelede beklemtoon, bid Paulus na aanleiding van sy voorafgaande lering ("Om hierdie rede ...", v.14, OAV).

Maar, onthou julle, hy wou eintlik al aan die begin van h.3 met die gebed begin het (3:1), maar het homself toe in die rede geval. Dis gevolglik duidelik dat dit wat 3:1 voorafgaan in gedagte gehou moet word as mens die gebed reg wil verstaan.

Dit dwing ons om oorsigtelik na h.2 te kyk.

□ As die apostel in Efesiërs die gevalle mens beskryf, sê hy onder meer dat sy lewe gekenmerk word deur 'n dubbele *vreemdelingskap*. Eerstens is hy "vervreemd" van God, sy Skepper (4:18, OAV). En tweedens is hy "vervreemd" van sy medemens — wat nooit méér radikaal tot uitdrukking gekom het as in die diepgaande geskeidenheid en vyandskap tussen Jood en heiden nie (2:12, OAV).

In altwee gevalle gebruik Paulus 'n woord wat dui op die uitsluiting van alle gemeenskap en intimiteit (Gr. *apallotrioo*, 'n woord wat net nog een keer in die Nuwe Testament voorkom — in 'n parallelle uitspraak in Kol 1:21).

□ Maar beide hierdie geskeidenhede word deur God se genadewerk in Christus opgehef.

- In 2:1-10 breek die apostel wonderlike perspektiewe oop op die herstel van die verhouding

tussen God en mens. Waar die natuurlike mens dood is in sy sonde, 'n slaaf is van die wêreld, die duiwel en sy vlees, en onder die toorn van God verkeer, is die mens in Christus saam met Hom lewend gemaak, saam met Hom opgewek, en saam met Hom laat sit in die hemele.<sup>1</sup>

- In die res van die hoofstuk het Paulus dit oor die opheffing van die tweede geskeidenheid — dié tussen Jood en heiden.

In 2:14 praat hy van die "middelmuur van skeiding". Dis na alle waarskynlikheid 'n verwysing na 'n muur op die tempel terrein wat verhoed het dat nie-Jode te ná aan die tempel kom. Die beroemde Joodse historikus, Josefus, skryf meer as een keer oor hierdie muur. Op gereelde intervalle was daar blykbaar teen die muur groot kennisgewings wat heidene gewaarsku het om nie deur die deurgange in die muur te beweeg nie. Minstens twee sulke waarskuwingborde is reeds ontdek — waarop alle nie-Jode gewaarsku word dat hulle net hulleself te blameer sou hê as hulle ná betreding tereggestel sou word.<sup>2</sup> So kan voorbeelde vermenigvuldig word van hoe erg die Jode die heidene gehaat het.

Maar hierdie skreiende antagonisme en geskeidenheid tussen Jood en heiden word in Christus opgehef (2:13-22). Deur Sy dood aan die kruis het die Here Jesus 'n einde gemaak aan die vyandskap. Jode en heidene wat in Christus is, is nou nie alleen met God versoen nie, maar ook tot één liggaam verenig (16). Die Efesiërs — uiteraard veral heidene — was nou "nie meer vreemdelinge en bywoners nie, maar medeburgers van die heiliges en huisgenote van God" (19, OAV). En só het die wêreldwye kerk van Christus soos "een nuwe mens" tot stand gekom (15, OAV).

Oor en oor onderstreep Paulus in hierdie brief die wonder en eenheid van Christus se liggaam, weliswaar aan die hand van verskillende beelde.

---

1. Om die duiselingwekkende betekenis daarvan te verstaan, moet mens dit weer in die lig van h.1 lees - maar dit sou ons te ver wegvoer van ons huidige tema af.

2. John Stott, *God's new society*, 1979, p.92.

In 2:20-22 sê hy ons is soos bakstene wat saam opgebou word tot 'n enkele tempel waarin God deur Sy Gees lewe — 'n tempel wat uiteraard bestaan om God te verheerlik. In 3:6 sê hy dat Jode en heidene mede-erfgename is, saam die liggaam van Christus vorm, en ook die beloftes van God deel. En kyk net hoe beklemtoon Paulus dieselfde waarheid in 4:1-6.

❑ As Paulus dus hier in Ef 3 bid, is die wonder van dit waarmee die Here besig is, voorop in sy hart: *'n nuwe familie wat uit die gevalle wêreld uitgehaal word — 'n nuwe en verenigde mensheid in Christus!*

Dis 'n gesin waarvan die grense ál die geslagte van die geskiedenis omvat. En uiteindelik gaan dit bestaan uit verteenwoordigers van elke nasie, stam, volk en taal. Nog meer, dit sluit nie net mense in wat nog op aarde is nie, maar ook ontelbaar baie gelowiges wat reeds heengegaan en in die hemel is.

## WAT SÊ DIT VIR ONS?

### 1. Laat 'n sentrale aspek van ons Christenskap se beleving en uitlewing altyd wees dat ons nou deel is van die Vader se huisgesin — wat nie net alle kulturele en nasionale grense oorspan nie, maar ook dié van tyd en ewigheid.

Sonder twyfel het die kerk nog altyd verskillende nasionale en kulturele gesigte gehad — en dis op sigself nie verkeerd nie. Ononderhandelbaar, sekerlik, geld die basiese beginsels van die Nuwe Testament. Maar onvermydelik het die kerk van plek tot plek en van tyd tot tyd ook 'n historiese en kultuurbepaalde gestalte wat vrylik tot uiting mag kom, omdat dit op die vlak van die sekondêre lê.

*Die wêreldwye en tydlose eenheid van die kerk moet egter kompromieloos deur ons vasgehou word.*

- Ek praat nie van 'n bloot organisatoriese of ekumeniese eenheid nie. Dis die pad van die valse kerk, aangesien institusionele stutte die kerk moet regop hou waar die Gees nie teenwoordig is nie.

- Voorts, het die kerk onder die Afrikaners nie die pynlike en Godonterende ervaring van hoe ons

teks oor geslagte heen geweld aangedoen is nie? Maar dis omdat ons *sakralisme* — die vermenging van kerk en staat, van geloof en kultuur, van evangelie en politiek — met ons moedersmelk ingekry het. Nee, die kerk in Christus is één — al sou mens vanweë taalverskille, afstand, of ander praktiese faktore apart vergader en groepeer.

As ons vadere maar verstaan het dat daar so iets soos 'n ware kerk is, en so iets soos 'n valse kerk — en dat die ware kerk God se *alternatiewe eenheidsgemeenskap* in hierdie wêreld is!

### 2. Weliswaar is ons nie meer vreemdelinge en bywoners nie (Ef 2:19, OAV), maar juis dáárom is ons nou vreemdelinge en bywoners (1Pt 2:11).

Die oomblik toe ek uitgehaal is uit die gevalle mensheid in Adam en oorgebring is na die nuwe mensheid in Christus (Rm 5:12-21), het daar 'n *nuwe geskeidenheid* in my lewe ontstaan.

Veral in onervare Christene se lewens kan dit tot geweldige konflik lei. Trouens, as dit nie gebeur nie, was daar moontlik nooit regte bekering nie. Want vir iemand wat wedergebore word, gaan die ou dinge verby en word alles nuut (2Kor 5:17, OAV). Daar is 'n nuwe hart, 'n nuwe lewensbeginsel, nuwe gerigthede, nuwe prioriteite, nuwe ambisies, nuwe hartstogte — 'n totaal nuwe lewe. *En dit dwing jou teen die stroom en behepthede van die ongelowiges in — wat jou 'n vreemdeling in hierdie wêreld maak.*

Tog, aan die ander kant, raak iemand wat die reddende genade van God ontvang het, onmiddellik bewus van 'n roeping om na die gevalle wêreld uit te reik. Word ons nie geroep om sout van die aarde en lig van die wêreld te wees nie? Het ons nie die opdrag om die evangelie ver en wyd uit te dra nie?

Om al hierdie kragte in ewewig in jou lewe te kry, kan baie jare se stryd en soeke verg. Maar moenie moedeloos raak nie, want jou konflik is 'n aanduiding van jou erns — en as sodanig 'n loffer wat jou Vader behaag. Ek weet, in die proses vang mens soms dwaashede aan wat die Here se Naam in oneer bring. Maar dis hoekom die Here Jesus herders in sy gemeente stel. Diegene wat Hb 13:17 ernstig opneem, sal 'n duisend slaggate vermy.

### 3. Laat ons nie moedeloos word as die kerk — ook ons eie gemeente — soveel te wense oorlaat nie. Nee, laat ons soos Paulus vir die kerk bid.

Paulus was hopeloos verlief op Christus — maar ook op sy liggaam, die kerk. En hy het die grootse voorregte, maar ook roeping van die kerk verstaan.

Vandaar sy allesoorheersende ambisie vir die kerk. Hy het egter begryp dat die struikelblokke om waarlik kerk te wees, reusagtig is. En dis waarom hy bid. Want as 'n kind van die Vader onweerstaanbare innerlike aandrange ervaar, maar dit nie self kan bewerkstellig nie, bid hy of sy, nie waar nie — weer en weer. En presies dít is wat hier gebeur.

Ek pleit dus by jou: moenie rus voordat Paulus se hartstog vir die kerk en haar roeping nie ook in jou brand nie. Wy jouself dan onvermoeid aan voorbeding vir die kerk — volgens die model wat hier in Ef 3 (en elders) vir ons voorgehou word. Want, wat die wêreld in ons sien, móét hulle besef kan net in terme van die algoeie en genadige God se herskeppingswerk in Christus verklaar word.

Bid ter wille van die Here se eer en die redding van derduisende in ons land wat totaal sinies geraak het oor die kerk — omdat hulle nog nooit kon onderskei tussen die ware en die valse kerk nie.

Lees Art. 29 van die Nederlandse Geloofsbelijdenis deur — en verstaan jou roeping!

## Nico van der Walt

---

Antipas Gereformeerde Baptiste Gemeente (Pret): 25/12/05  
Posbus 12371, Queenswood, 0121  
T: (012) 329 3012; 082 7766 141  
E: nico.vanderwalt@reformed.org.za  
www.reformed.org.za; www.sola5.org

---

- Hierdie preke word elke week by die honderde gratis en wêreldwyd per e-pos gestuur aan elkeen wat dit graag wil hê.
  - Geen kopiereg. Dupliseer gerus. Of stuur elektronies verder.
  - Preekopnames: nunide@absamail.co.za; T: 012-8083906.
  - Graag stuur ons 'n bekendstelling aan mense wie se name u vir ons mag aanstuur, maar plaas mense net op ons adreslys as hulle dit dan sêf versoek.
-